

NIKAH LARI MENURUT PANDANGAN HUKUM SYARAK DAN UNDANG-UNDANG

Menurut Kamus Dewan, definisi nikah lari adalah suatu pernikahan di antara pasangan lelaki dengan wanita yang kebiasaannya dilakukan secara suka sama suka di tempat lain tanpa disaksikan atau direstui oleh kaum keluarga. Nikah lari biasanya melibatkan wanita yang melarikan diri daripada wali untuk bernikah.

Peranan wali dalam pernikahan sangat penting kerana ia merupakan salah satu daripada rukun nikah. Pernikahan yang dilakukan tanpa wali yang sah adalah pernikahan yang batil dan tidak sah menurut hukum syarak. Manakala pernikahan yang dilakukan dengan menggunakan wali yang tidak diiktiraf adalah merupakan pernikahan yang terdedah kepada keraguan dan pasangan boleh dipisahkan disebabkan pernikahan tersebut yang fasid (rosak) dari sudut perwalahan.

Suatu pernikahan yang dilakukan hendaklah selari dengan hukum syarak dan undang-undang. Nikah lari adalah suatu pernikahan yang jelas bersalahan dengan Undang-Undang Keluarga Islam. Oleh itu, pasangan yang terlibat dalam bentuk pernikahan seperti ini hendaklah segera membuat permohonan pengesahan pernikahan mereka, bagi memastikan kesesuaian pernikahan tersebut. Pasangan yang gagal mengesahkan pernikahan, boleh mengakibatkan status pernikahan dan status anak-anak mereka diragui.

Berdasarkan statistik, jumlah pendaftaran permohonan pengesahan pernikahan di Negeri Selangor dalam tempoh 5 tahun iaitu daripada tahun 2015 sehingga tahun 2019 adalah sebanyak 5877 kes, dengan purata sebanyak 1175 kes setahun. Terdapat penurunan yang ketara pada

tahun 2020 dengan hanya 683 kes sahaja yang didaftarkan. Penurunan ini dipercayai oleh faktor Perintah Kawalan Pergerakan (PKP) yang bermula pada 18 Mac 2020.

Purata pendaftaran kes dalam tempoh 5 tahun tersebut, menunjukkan suatu keadaan yang tidak sihat kerana ia menggambarkan masih ramai pasangan yang terlibat dengan nikah lari setiap tahun. Berikut adalah di antara sebab-sebab berlakunya nikah lari iaitu pasangan tidak mendapat restu keluarga, wali enggan menikahkan wanita di bawah tanggungjawabnya, poligami, pasangan terlanjur, tidak mempunyai wali dan pelbagai alasan lain.

Atas alasan tersebut, pasangan memilih untuk nikah lari sebagai jalan singkat bagi mengatasi masalah perwalahan walaupun perbuatan tersebut membelakangkan undang-undang.

Masyarakat sering alpa terhadap implikasi nikah lari yang sangat besar, apabila ia melibatkan keabsahan pernikahan. Jika pernikahan tersebut tidak sah, perkahwinan boleh dibatalkan dan pasangan akan dipisahkan (difaraqkan). Wali juga boleh memohon kepada mahkamah untuk membatalkan pernikahan pasangan tersebut, atas alasan yang munasabah di sisi syarak.

Perbuatan nikah lari ini mempunyai kesan yang tertentu dari sudut Hukum Syarak. Hadis Rasulullah SAW daripada Aisyah RA ada menyebutkan bahawa

"Seorang wanita yang berkahwin tanpa izin walinya, maka pernikahannya adalah batil, batil, batil. Dan apabila mereka (wali) bersengketanya, maka pemerintah adalah wali bagi wanita yang tidak memiliki wali."

Hadis ini diperjelaskan dalam Kitab al-Mu'tamad fi al-Fiqh al-Syafi'i bahawa wali bagi wanita merupakan rukun dalam



pernikahan kerana wanita tidak boleh menikahkan dirinya sendiri. Menurut kitab tersebut, wali bagi wanita adalah orang yang terhampir dengannya dari sudut pertalian nasab. Perwalahan tidak boleh berpindah kepada wali yang lain tanpa sebab-sebab yang dibenarkan oleh syarak.

Setiap pernikahan yang telah disahkan oleh mahkamah hendaklah didaftarkan di Jabatan Agama Islam negeri-negeri. Kegagalan mendaftarkan pernikahan, boleh mengakibatkan segala hak pasangan dan anak-anak seperti tuntutan nafkah isteri dan nafkah anak, tidak dapat dilaksanakan sebabnya menurut undang-undang dan hukum syarak. Perbuatan nikah lari yang sinonim dengan pernikahan tanpa kebenaran merupakan satu kesalahan matrimonial di bawah seksyen 40 Enakmen Undang-Undang Keluarga Islam (Negeri Selangor) 2003 dan pasangan tersebut boleh dihukum dengan tidak melebihi RM1000 atau penjara tidak melebihi 6 bulan atau kedua-duanya sekali.

Undang-undang yang digubal adalah bagi menjaga kemashalatan dan bukannya menzalimi masyarakat. Sekiranya seseorang wanita itu tidak mempunyai wali,



wanita tersebut boleh membuat permohonan wali hakim menurut seksyen 18 Enakmen Undang-Undang Keluarga Islam (Negeri Selangor) 2003. Manakala, sekiranya wali enggan menikahkan wanita di bawah tanggungjawabnya, satu permohonan 'wali enggan' boleh difailkan di mahkamah berdasarkan seksyen 13 Enakmen yang sama.

Apabila seorang wali tersebut enggan memberikan persetujuan tanpa alasan yang munasabah menurut syarak, mahkamah boleh membenarkan perkahwinan tersebut diteruskan dengan menggunakan wali hakim. Peruntukkan undang-undang inilah merupakan jalan penyelesaian yang tuntas kepada permasalahan wali dan bukannya memilih untuk lari daripada wali.

Pernikahan yang dilaksanakan mengikut prosedur perundangan bukan sahaja menjamin kesahan pernikahan tersebut, bahkan hak-hak yang wujud akibat pernikahan tersebut juga turut terbeli dan terjaga.

